



*Circoncision de ceux qui estoient naiz au desert. Celebration de la Pasque ;
 & la prise de Iericho.*

L'ARRIVEE des enfans d'Israël, qui avec leur armée conduits par Iosué, auoient passé le Iourdain à pied sec, donna vne extrême crainte aux Amorrhéens & Chananéens, qui oceuipoient la terre promise. Alors par le commandement de Dieu, la Circoncision fut pour la seconde fois commandée à Iosué : d'autant que ceux qui estoient naiz aux deserts ne l'auoient esté, & furent circoncis en Galgal. Puis le quatorzième du mois ils celebrent la Pasque en la campagne de Iericho, & le lendemain ils mangerent des fruiçts & du pain sans leuain de cette terre, où la Manne cessa lors. Peu apres le Seigneur assura Iosué que Iericho & le Roy d'icelle estoit en sa puissance, & qu'il fist par sept iours porter l'Arche de l'Alliance à l'entour de la ville avec sept trompettes sonnantes deuant l'Arche ; & ainsi fut fait : Et à la septiesme fois que l'Arche de Dieu fut portée à l'entour de Iericho, le peuple avec le son des trompettes fit vn tel cry & bruit, que les murailles de Iericho tomberent. Et chacun monta en la ville, où tout fut mis au fil de l'espée, sans espargner autre que Rahab & ses parens, reconnoissant qu'elle auoit logé & sauué de mort les espions que Iosué y auoit auparauant enuoyé.